



宋學士徐文惠公存稿卷之三

裔孫 鑒 校梓

雜著

回皇太子送出朝劄

四載執經邈無裨益一朝被論惟有愆尤祗知隱跡
以出關奚敢徹名於記府乃蒙仁言撫問恩意寵綏
將之篚帛以燠其寒賜之官楮以調其乏百拜俯僂
萬感輸悃載念經孫罪大罰輕仰戴聖恩之寬宥辭
溫意厚更叨儲極之垂憐東望潜然西歸榮矣第孤

蹤既返於私室無一字敢入於帝城伏願皇太子殿下寅奉君親恪循身教謹言語節飲食妙全願養之功尊德性極高明允迪中庸之訓暫輟閣中之註述益勤聖慮之踐脩是爲三代有道之君永迓萬年無疆之福經孫無任戀德輸忠之至謹奉牋以聞謹牋
申中書省辭監察御史兼崇政殿說書狀

照對今日二十四日准尚書省三省全奉御筆除臣監察御史兼崇政殿說書日下供職臣於次日具奏辭免今日日准尚書省劄子備奉聖旨不允者渙頒

成命震惕愚衷切以烏臺爲糾察之司金華輔緝熙之學尊朝廷必李勉而後可成君德惟程頤其實宜况稍涉奉承是自銷於風采而無能啓沃曷贊仰於聰明必得譽髦乃稱親擢如經孫者來從州縣躡綴班行資望淺則何以振風憲之綱學術踈則無以爲日就之益雖已騰於免牘猶未拜於俞音欲望公朝特發敷奏亟收誤渥改畀名流庶使非才少安微分所有省劄未敢祇受須至稟聞者

上樓監丞牒

徐文惠公存稿 卷之三
朝散大夫徐經孫牒上奉使監丞郎中照會今月初
一日夜承公文准省劄備奉宣諭指揮差委貴職前
來諭旨令其還臺治事伏承傳宣恩言開讀再三無
任感激經孫自知瀆犯天威不稱言責惟知屏息以
俟誅夷豈敢回臺重污朝廷綱紀之地除已披肝瀝
膽具錄回奏又復迤邐前去以俟威命湏至牒報者
右牒請照回故牒

祀明堂赦文

寅恭宏圖祇若成憲稱秩元祀率先申以蒐儀於昭
明堂歷吉辛而展采然禮之大者非無可稱而神之
格者惟德是歆億萬年敬脩之心秩然咸叙四十載
憂勤之治常謹持盈賴兩儀之儲祥荷列聖之垂祐
陰陽和而物無疵癘雨暘若而歲比豐登青海歸疆
咸謳歌于西北黃旗協道盛溫厚於東南方且却遠
人之貢以昭德心減明年之租以紓民力往于攸濟
迄可小康爾休爾游當知申命之自我將我享益申
報本之恩先一日而致齋極三日之儼恪如見所祭
不顯亦臨款謁真宮入裸太室載鸞旗乘玉輅匪棘

匪徐披龍袞執鎮圭有嚴有翼乃酌鬱鬯乃蒞中壇
亞獻芬芳昭震子之主器顯維雍穆萃髦士之奉璋
邊豆靜嘉羽毛紛盛美光服貺衆星留俞月波日耀
之宣明乾端坤儀之軒豁加荐享矣清明暢矣維天
佑之福履綏之緬懷乾德癸亥賜赦之書順考皇祐
季秋肇禋之詔一以無私之義法天地一以大公之
道服臣民烱如日月允矣垂訓敬其夙夜奉以畏威
惟熙事之告成可朕躬之專享歛時五福普及萬方
可大赦天下云云於戲惟天付予有家朕必思于兼覆

本朝以仁立國朕必廣于好生尚賴輔弼必恭之臣
小大承統之寄具宣實意式迓昇平共躋仁壽

祭龍門碑文

斗牛之分有名山馬水流其中四時濛濛有本如是
浩浩淵淵潭曰龍潭門曰龍門疑有神物輸流而遷
七寶層翠好峯贊元千佛可廬名經可繙爰相厥攸
門而不關有亢其高風雲往還表之以江西倫魁之
筆實之以吾黨非常之原吉涓剛辰揭虔奉安崇酒
於觴實殺于盤荐此馨香以啓蟄蟄柱香秋馥桃浪

春翻神其相之有開必先

新堂梁文

伏以倦游愛吾廬偶得東源一區之勝辛勤有此是
祖適中堂四時之宜日月維良風雨攸除恭惟矩山
主人一生僥倖百事迂踈壯歲詞場誤成蠅於點墨
比年客路旅振鷲於光庭書殿極儒生之榮憲府濫
言官之責不能者止盍歸乎來顧老屋以弗支勢湏
改築去先廬之未遠地適可安三江交流有朝有護
四山回抱如拜如迎是爲覺溪之中舊襲孔園之號

傍羅古木若預封培前行平疇最宜眺望賢哉宗黨
成此畝宮爰集棟梁楹桷之材以爲親賓冠婚之所
地勢頗隘於我有餘自此息影林間得依美蔭學耕
谷口惟願豐年得爲太平之民茲實老來之福千萬
間庇寒士賴有時賢三十年携束書聊逸吾老試題
吟筆助舉脩梁

東 丹闕巍巍照眼中曉望扶桑秋日表葵心如拜
乃赤雲紅

西 羅浮峻極與雲齊水演龍門清且近此堂新枕

此山溪

南 梅峰對面蔚晴嵐方正不移天所作欲知絜矩
個中叅

北 幢節分龍來石壁勇如渴驥欲奔泉水口此山
天與力

上 水遶山圍更平曠良天好月賞心時密爾鴿原
互來往

下 自古箕裘學弓冶詩書門戶要支持須是肯堂
仍肯架

伏願上梁之後百年偕老億世奠安泉甘土肥漸遂
山林之樂風調雨順益知棟宇之安書脉其昌福基
以壯

吳塘勉仲建廳梁文

伏以中堂落成山竦飛輦之勢前榮高殿復恢旋馬
之規展矣高明美哉輪奐恭惟勉仲主人精神秋水
笑語春風心逸而休克守過庭之訓面勢必審更深
肯架之思爰自舊年迄成新築望先廬之未遠覺勝
槩之彌多塘瞰大寧泓然可鑑岡連石金巋若具瞻

青山當戶流水入池白雲爲藩寶氣在闥况有前人
之命是爲安宅之基狀與目謀屋兼身潤又念親賓
冠婚之所當有東西階序之分乃詔工師乃宣哲匠
厚棟大梁以禦寒暑廣居正位以備周旋揖遜其間
登降有數屏開孔雀未數李監之豪家瑞應麒麟會
慶徐卿之有子脩虹斯舉賀燕聿來

東 主人胸次妙春融門前又報高軒過坐我光風
霽月中

西 山頭寶氣喜朝躋客來柱笏閑相對咲指浮雲

自有梯

南 不寬不隘笑潭潭我閑居第傳孫子文靖當時
有美談

北 華堂相值真安宅方寸心田萬卷書箇是君子
無窮澤

上 舉首先廬盈一望好天樂事賞心時棣萼相輝
互來往

下 家塾旁開文字社堦庭蘭玉香詵詵鸞鶴書聲
連晝夜

伏願上梁之後家庭睦肅門戶光輝智以謀之仁以居之敬脩其可願祿爾康矣嘏爾常矣亦維適之安

贈課術王宗岩序

余平生安於今而星數之說未學間有爲余言而驗者百一二爾惟蜀士李德甫嘗課予命自辛亥而乙丑由提管而龍圖節節皆驗如印券然予甚神之而惜其不復見宗岩王君一日過予謂得其術其課予卦數亦頗與甫合然德甫嘗自言其術無文可傳不知宗岩何以得之也雖然不必問其術傳不傳惟當觀其驗不驗於其別也爲序以送之

黃紹谷詩序

沈江黃君妙年篤學勵志前脩暇日彙其詩不鄙示余余開卷讀之則後村李公省身雷公各爲著語而蒼山曾公又爲易其字曰紹谷蓋以山谷文章之印期之也余復何言然嘗讀鶴山黃太史文集序有謂世之以詩知公者未也獨於其元祐史筆守正不阿艱險百罹不見隕穫者再三致敬慕之意然則紹谷合志其大者焉勉旃毋怠

黃元肇江山風月閣詩序

江山風月黃元肇燕息所也梅亭先生翰林季父溪山翁和之諸賢繼是有詩有序有記搜抉其秘天地無盡藏發越殆盡而元肇猶謂余獨欠著語余惟天地清明之氣莫如風月而挹之江山尤清明之至也元肇家傳山谷之印見聞文獻與他人殊而遊目騁懷又有江山風月之妙余復奚言然元肇亦有思夫自有此天地卽有此江山昔也清夜故園地靈尚闕人謂斯何今也飛閣渠渠登臨得要人謂斯何況山

徑之蹊介然成路滄浪之水清斯濯纓孟氏此語豈直爲山水發哉反之身心亦猶是也余方有警於是願與元肇加習察之功一燕息頃因水上之風而識天下之至文因月林有影而悟容光之必照庶乎與天地同一清明而不獨以嘲風弄月爲得江山助矣

寇萊公題永興驛詩跋

昔擁雙旌在斗城今朝孤館語同名天連秦樹無因見極眼空遙悵望情右二十八字寇忠愍萊國公所賦也謹按國公以天禧己未召自永豐軍拜中書侍

卽兼吏部尚書同平章事明年七月罷尋降授太常少卿知福州八月徙安州再貶道州時也問之故老此驛名永興後以公故名萊公館而或者又以皇華易之噫孰謂永興驛不如公安之竹乎切惟君子所遇山川草木皆得蒙被芳潤以托不朽况嘗有遽蘆之托翰墨之留乎後二百一十九年當嘉熙戊戌邑令南昌徐某因葺是館刻詩壁間仍今名而堂以萊公扁於以存先賢之蹟回此地之光景云

黃季清註朱文公訓蒙詩跋

右訓蒙絕句五卷晦菴先生朱文公之所作也其註則沈江黃君季清之所述也謹按先生自序謂病中默誦四書隨所思記以絕句後以代訓蒙者五言七言之讀然自今觀之上至天命心性之原下至洒掃步趨之末帝王傳心之妙聖賢講學之方體用兼該顯微無間其目雖不出於四書之間而先生之性與天道可得而聞者具於此矣其曰訓蒙乃先生謙抑不敢自謂盡道之辭云耳季清研精是編有年矣一日心會理融句析字解因先生之言探先生之學或

取諸章句集註或取諸文集語錄又參以周程橫渠
五峰南軒勉齋西出諸書如網以黃鍾而四聲迭和
原於岷山而百川會同其例則先訓詁後文義一如
先生註書之體自非潛心之久味道之深何以及此
其釋命詩云新者如源來無窮也舊者如流往不返
也其什戒謹恐懼詩云寇未至則高其垣墉欲未動
則敬以直內此皆得先生言外之意余與季清交四
十年中間辱授館者非一載見其讀書專靜反覆沉
潛弗得弗已知其他日所進有非不肖所能及其後
數歲一見每見必進於昔今於所註書益信雖然先
生之詩章句云乎哉皆其得於心見於躬行日用之
際僥焉孳孳有不容以自已絕句凡九十八首始於
天而以事天終焉其辭有曰存養上還天所付終身
履薄以臨深余以季清今老矣尚皆懋敬哉季清名
惟寅氏伯新寔從加齋學師友淵源有自云

黃山谷內集詩跋

太史黃公詩有內外集夫任氏所註者內集板木雖
多而其烏鳥傳寫之誤亦自不少暇日稍加較正刻

之閩憲始與薊城所刊薊室外集註並傳之

黃月山解金剛經跋

月山黃獻之余老友也生平歸儒解金剛經偶黃電
岩以所繪真像示余爲下轉一語時咸淳辛未五月
既望矩山老人徐經孫書其上而歸之若以色相見
我能知者微若以音聲求我能知者幾大虛雲散大
音聲希月山居士之子孫永言孝思於時保之

長孫敏學冠說

正月丙午吉叶於卜吾孫敏學肇加元服古者冠禮

三加彌尊厥初祝辭訓義具存始加曰棄汝幼志蓋
欲其童卯之習痴劣之態絕之而若棄也再加曰敬
汝威儀蓋欲體貌必正色辭必莊可象而可畏也三
加曰以成厥德蓋欲其爲人子爲人臣爲人弟而成
人之德備矣三加之禮彌尊三祝之辭有序蓋必如
是而後元服之無愧也於戲既莊爾首毋邪爾思今
爾何盟是訓是彝今汝何懲於嬉於隨學以自強敏
以求之受天之慶福祿咸宜

姪壬泰冠說

咸淳三年九月望日猶子壬泰冠老伯矩山爲之說
其辭曰我如汝年冠於王正今子旣冠迨此秋清古
者冠禮盛服夙興筮日筮賓其責匪輕言行貌思規
矩準繩汝其未忘思誨是名字以必矩維我思榮念
哉敬哉杲日東升

乙泰冠說

古重冠禮盛服夙興今子旣冠祝辭是聽家學淵源
汝其繼承顧諟明命迅如雷霆有慾必窒有忿必懲
名曰思諛字曰必明友愛同氣溫然如春佩服斯語

其書諸紳

香遠舟記

余友羅仲志種蓮植梅着亭其間取濂溪香遠益清
之說康節夙駕寒香遠遠留之句合名曰香遠舟蓋
以其亭之如船也余和之曰盛夏流金爍石百卉欲
焦而有蓮焉大寒折綿冰漬萬木禿立而有梅焉予
於是掀蓬四望或雲錦之絢爛或冰雪之清妍玉壘
有神亦知其香之遠乎余聞得陰陽之和者寒暑不
能隕其節守性命之正者威制不能易其操子如悟

此則知二先生之所取或曰東坡詠茶糜亦云無風
香自遠曷不取而叅之予曰隨芳而倚賴東風者蓮
梅之所羞也又馬得俎豆之哉仲志曰善請書以爲
香遠舟記

上丞相賈似道言限田

經孫嘗妄論今日大勢自庚申寶運重開之後聖天
子有乾旋坤轉之妙大丞相有再造乾坤之功琴瑟
既調百蠹盡洗武功既績三邊宴然從昔更化善治
未有速於此者聞知聖朝惟日和糴之數未能盡蠲

楮幣之造未能頓住不能不上貽聖君賢相之憂近
者全臺有言欲革二弊遠稽漢人名田之說近考先
朝限田之制除面官限外之數官買三分之一無官
之家亦以九品之限與之大約田千萬畝歲收七百
萬斛粟則可以盡免和糴之數楮幣可以住造而軍
餉亦無不足之患矣一舉而兩弊盡除甚大惠也且
漢人之說諸侯王公所占不過三十頃耳今一品至
五十頃所限比漢時爲優漢人自限曰外悉以沒官
今無沒官之令而限外祇買三分之一公家之利如

此民間之利如彼可謂仁之至義之盡矣然或疑此
令風行州縣之間必索各戶出身官誥而後知處占
品限虛實必索各戶砧基簿書而後知所買畝段着
落又不知官所給價將決於官牙耶亦祇據其契面
舊田之好惡將聽人戶所申耶亦從官司據契而面
點買也既買之後佃戶種贍將誰給之雨暘不齊或
有減放將誰主之或者又謂此去夏稅開場不遠官
民之交易未定夏稅必有遲疑不納之患住造之期
未卜目下增造有數恐有楮價日殺之疑甚者至謂

以浙西合買之田計之未必能及常年和糴之數他
路或如是所買之田又不足以爲所得軍餉之備又
如何此皆衆人之所疑者經孫切謂廟堂之上智慮
必周商確必定必無此慮特州縣之間官吏未必能
盡體朝廷安靜不擾之意民戶未必能盡體朝廷明
白洞達之心恐須條示畫一爲之區處使官吏有所
奉承而無所容其夤緣之擾人戶無所疑惑而有以
知吾平明之公則此二舉不惟可以除二弊興五利
實可爲長久之良策矣經孫自揆踈庸無補於世浮

沉州縣之久獨荷大丞相擢之踈遠置之清華數年
之間叨塵至此蓋必有以取之也今朝廷行此利民
之事倘或有所聞而不以告有所疑而不以獻則是
負恩於知己之地將無以自立於覆載之間矣經孫
朝夕思惟義不容默萬一所聞皆不足疑大丞相必
亮其愚不鮮事未必遽加之罪如聞或有所疑則少
加詳緩熟籌而後行之亦未爲晚經孫干冒斧鉞罪
當萬坐伏望鈞照

宋學士徐文惠公存稿卷之三終

宋學士徐文惠公存稿卷之四

裔孫 鑒 校梓

詩

四言

賜宜春易太極

易有太極在天地先兩儀四象是謂後天春臺得之
云自希夷吉凶禍福予以前知八十二宮頗與俗殊
數往知來曷其然乎

元旦訓孫

咨爾潭生今歲十六棄汝幼志企慕老宿收汝放心
歸就檢束業必精思書必勤讀敬事父母出入必告
欽奉師模傳習必熟友愛同氣如手如足珍重自身
如珪如玉非禮勿視祗汗青目非禮勿聽祗亂心曲
非禮勿言言必招辱非禮勿動動必非福翁作箴言
爾其佩服念哉敬哉中有天祿

五言

覺溪八景

雷奔石壁間瀑瀉洞門側蜿蜒乘洪濤變化莫可測

右龍門春浪

西風吹石岐鱗甲起深轍借問去來人誰是騎鯨客

右鰲頭秋風

初生半崖陰漸失雙峰翠倏忽滿太虛蒼蒼生望霖雨

右羅阜朝雲

溪月濯銀盤溪橋卧脩軌沙淨碧波寒分明見蟾闕

右潘溪夜月

山圍古寺陰曙隔鯨音發悠揚三四聲喚上東林月

右隆福晚鐘

飄蕭鷗鷺群浙瀝孤蒲晚雲斷山月明新泉落前澗
右驪塘暮雨

林館碧溪陰絃歌雜燈影夜分猶吾伊學海在人境
右水北書聲

詩家在東臯雞林價爭售作者復幾人風月三千首
右東源詩社

題施山觀音閣

閣道連雲棧簷牙覆竹陰南來天馬渡北落水龍吟
林鳥疑譚偈田花欲佈金凭欄觀下界洞見遠公心

長子思詵赴江西廩幕

三年永豐簿兩載半臨川納滿無多日竒逢有二天
臨民湏近厚減價要重蠲莫道違離遠常如在膝前
思詵生朝分忠勤酒侑之以詩

帝正纔五五吾子始生時潘縣花將錦陶門柳欲絲
與民同樂意在我卽琴棋酒自忠勤出公餘薦一卮
病中有感

習懶多成病旬餘久覆盃帳中聞燕語瓶裏看花開
醫已肱三折愁來腸九迴何時得踈散屐齒印蒼苔

幼子思誼舉次孫命名陽生

吾年七十四始見兩孫枝陽德初回候蟾光欲滿時
傳家惟簡冊願汝似蘭芝何日解言語能吟公此詩
送思詵之官鰲峰

我如汝年時昉問便江戍選穽如海深望洋吁可怖
汝今亦宜教去作鰲峰主有民環百里待汝字而撫
何以奉寬條何以撫黎庶惟公則生明平心閱牒訴
惟廉則寡過莫受脂膏汗惟勤則集事慎勿習逸豫
惟儉可無求只學我清苦持此四字符便是作縣譜

去家三百里兩地無多路安問來與往時走一健步
居官而民宜睽隔非所慮三年課最歸可以見君父
咸淳壬申六月不暑

常年六月六暑氣何其酷犬有吐舌煩猶得負背燠
今日胡不然蕭然涼氣足陽鳥潛其輝小雨時霖霖
重袂猶未溫浴了肌起栗老病固宜然壯者亦不浴
短至未及間秋陰如許毒本朝王火德德與堯運續
文明耀四海年世不待卜吾君乾六龍剛健粹如玉
吾相泰九二夬夬出莧陸君臣德旣同詎有此陰伏

吾聞氛氣惡殺氣盛西北襄城既失守生靈爛魚肉
匹夫尚懷憂知此妄屠戮臣固告上天恐淚不敢哭
願言掃陰邪日月舜耳目中國盛陽明從今調玉燭
六言

題伴雲樵唱

佛法生憎綺語道人安用樵歌有時言外悟意不覺
山中爛柯

自贊夏端甫所繪真

老我不堪位置歸來久混漁樵忽然珠玉在側見之

令人意消

七言

春班遇雪

拜賜通班近玉墀小臣今日覩朝儀雪花飛在藍袍
上潔白其身正此詩

和端茶訓子

三首

東坡月窟天香遠山谷雲濤味玉溫相對兩翁元祐
老說茶風味到今存

寫詩只到黃山谷又失西川蘇子賢更把名章細商

徐文惠公存稿 卷之四
略續絃那可惜膠煎

三日君詩當刮目有來字字到雲和從今喜入聖人
手孔杏壇中取瑟歌

南英會芳亭

衆芳會處得春多草色隨人氣亦和聞道吾宗好兄
弟棣花香裡細吟哦

過嚴子陵釣灘

仰止高風不可攀且啗生出鬼門關稽首臺前無復
過歸家斬却釣魚竿

和臨湘奉議孫敷山歸田十詠

并序

余引年得謝因思同里有前輩孫公奉議以年

未五十致其仕賦歸田十詠音調幽閑心切

慕之勉強追和然豈特其詩不可及及其見機

知止之早尤不可及也姑錄以示兒輩知里

中有此亦可以洗林下何曾見一人之謂云

仰止高風早賦歸晚生自恨不同時公如嶺上孤松

秀我亦松間百尺絲

尚記千官拱帝堯日隨環珮早趨朝螭螭下從容

際咫尺天顏未覺遙

喬山却似會稽陰千里孤臣淚滿襟沐浴恩波無地
報始知滄海未爲深

咸淳天子憐臣老紫殿清華極邃情賦祿玉隆直書
錦有時聽得步虛聲

九重憂責詎能分不雨羞爲出岫雲累疏丐歸今得
請保全晚節荷明君

北窓自有來薰處長夏何妨一枕高竹薄未能遮照
徧西風我欲障葡萄

活水一溪如玉瑩好山四面似螺堆個中自足歸吾
老莫待北山文勒回

家有園池幸未荒客來有酒或傳觴秋宵玩月冬觀
雪春日尋芳夏納涼

人心易溺誰能拯世道如瀾孰與回賴有聖賢遺訓
在好懷每爲古書開

早眠晏起自安恬頭上從教白髮添和了十詩賒七
字太平時節效陶潛

題安原寺

杜老曾留脩覺句韓公亦有岳山題愧無健筆希前
哲謾把飛紅鳥當踏泥

病起

二首

去年習懶因成癖瘦骨支離怯病魔今日團圓環四
世玉蒲細切泛金荷

上高殊邑尚吾鄉千里相忘是建康王事賢勞宜不
廢師生義重詎能忘

出朝賦歸來好

十一首

歸來好籬下菊花應未老晚香猶可薦清樽淵明醉

後和衣倒

歸來好兩歲引年章屢州聖恩寬辱不容閑今得生
還真大造

歸來好顏巷安居樂吾道此行不敢怨風聞只恨舒
君言不早

歸來好一入山林迹如掃杜門謝客免愆尤几淨牕
明讀莊老

歸來好菊後梅前宜問道退朝羽翼此心生從此五
更無起早

歸來好從此五更無起早雖然畎畝辦香心天子萬
年多壽考

歸來好三徑須宜有花草於中竹栢可耐寒更種長
松成四老

歸來好飲食起居隨晏早閑身樂得未龍鐘東阡西
陌尋芳草

歸來好茅簷曝背無煩惱欣時讀易困時眠箇中輸
與痴頑老

歸來好龍門有山名七寶宿生泉石頗有緣往來儘

可休吾老

歸來好萬喜千歡無煩惱日課吾孫讀古書此是吾

家傳世寶

北坑拜掃有感

手植松楸四十年扶踈枝葉欲參天四兒惟有衰翁
在時領孫曹拜墓前

題金魚郎

金魚有術妙談天走遍江湖謁俊纏玉帶貴人如一
遇定知換酒不論錢

贈射虎人

馮婦下車須有勇將軍射石亦通神南山白額新除
害好賞今時射虎人

去國

崎嶇山路記曾遊誰識爲臣去國愁栢府官中羞豸
角桐江臺上愧羊裘重違君命留行者旣竭吾才歸
去休霜露感人千里思松楸未掃已三秋

北壑瀛洲亭

山中有水水中洲欲訪蓬瀛此處求孤嶼插天如擘
笏危亭臨渚似飛樓竝崖香草仙餘藥隔岬人家風
引舟箇裏藏脩功行滿弘文學館快情遊

山塘精舍

歸來魚鳥亦相親草創山塘謾以名旋築堤防留水
住盡除菑翳聽松聲族姻語語人情洽雲勢陰陰天
氣清好續溪山真率會從今八景又重成

恭和御製詩

多士新暉禹貢冠對天忠切動龍顏臚傳聲徹頒袍
笏燕喜筵開肅佩環樂奏簫韶成廣內詩成全畫照

人間微臣捧詔慙踈拙也抱傳宣拜賜還

弭節堂

慙慙主禮重賓榮弭節新堂慶落成語熟不妨移座
密更長那復記盃行轄投相共傳佳話榻下于今見
故情太史定知牛斗分客星也傍使星明

慶仲明弟領鄉薦

記得溪山橫膝語何時解取世科收薦名恰在二八
數屈指重來四十秋歲月滔滔催後進功名冉冉繼
前脩福州得捷知安福更願君恩賜狀頭

福州卽景

一別居諸歲月增遙聞此景盡難能潮田種稻重收
穀道路逢人半是僧城裏三山千簇寺夜間七塔百
枝燈常年六月東山裡地湧寒泉漱齒冰

福州鹿鳴宴

鹿鳴今日宴佳賓六萬場中一百人鰲嶺峰前連巨
釣龍臺高處耀脩鱗假途文字皆由命實地功名好
致身得意春風馬蹄速杏園交慶綠袍新

長孫敏學授承務郎

辛勤場屋一書生六卷時文謾策名身事兩朝奚所
補恩覃五世亦何榮。前人慶澤宜豐報爾輩官曹詎
可輕移孝爲忠斯不負更須勤學紹家聲

黃元肇江山風月閣

江山到處堪圖畫風月無邊自古今但要清明如外
境便分動靜卽吾心坡仙取用原無盡康節登臨豈
浪吟天理流行須體識莫將嘲弄費光陰

培芳亭草創胥會

培芳草草創強鋪筵畫出清明三月天長少團樂還五

世笑談邂逅集群賢或歌或奕盃無算非竹非絲樂
自然過則相規善相勉須令和氣藹無邊

送仲時弟

江關千里隔山川有弟能來慰眼前方喜鴈行隨處
樂可堪蟾影別時圓暑行勿亟宜強飯湍激多驚莫
問船歸到家山相勞苦團樂恰是菊花天

題西坡芳心亭

翛然古木湛然池樂意相關自造微莊子非魚真實
問海翁狎鳥本忘機樽中有酒逢人酌琴上無絃信

手揮秃盡剡藤吟不就妙哉川泳與雲飛

賀汝立拜恩封

君恩歲序兩俱新鸞詔叨榮鶴髮親天上龍光疏雨
露堂前燕笑壽松椿孫枝子舍皆騰踏蘭省璧池交
問津此去椒盤重獻頌斑衣中有綠衣人

和李後林分惠瑤花降字韻

詩句尋芳自抑揚一觀佳什覺心降山中玉蕊雖無
數天上瓊花孰有雙愧我未能瞻後土荷君分惠到
南牕從今可小中興瑞大地移根到此邦

乙丑三月十二夜夢得家有園池樂壽康之句

覺而足成效邵康節作首尾吟八首

家有園池樂壽康四時隨分得徜徉魚遊春水吾同
趣蓮拆秋房客共嘗風裏松聲傳古調雪中梅蕊驗
初陽官閑身老猶幫俸家有園池樂壽康

家有園池樂壽康閑中日月覺偏長睡餘携幼遊花
圃飯後呼童給鶴糧堆案縱橫書數冊隨盤歡喜酒
三觴客來問我渾無事家有園池樂壽康

家有園池樂壽康君恩廣大壽無疆玉龍自是神仙

骨紫殿容依日月光不織不蚕時賜帛無功無過歲
支糧老臣得此知慚愧家有園池樂壽康

家有園池樂壽康撫存松菊未爲荒斛租不及胡椒
數樊圃何如步障長靜裡謾看猿弄臂閑中時聽鶴
鳴吭山林陰密宜藏拙家有園池樂壽康

家有園池樂壽康人生何用苦乾忙三冬慣曝茅簷
日九夏貪眠竹簟涼大寫文書遮老眼熟煨芋栗飽
枯腸無榮無辱渾無事家有園池樂壽康

家有園池樂壽康北牕何敢傲羲皇池開滿引靈淵
脉戶廠西迎太乙光初節易渝誰保晚好人難做必
觀常老來自適閑中趣家有園池樂壽康

家有園池樂壽康晴簷曝日小春陽爐存楫拙火難
過觥酌芹蔬味更長更覺寒威潛出戶便令和氣復
連床團圓家慶堪圖寫家有園池樂壽康

家有園池樂壽康浮雲富貴利名場欄栽藥相揚樓
美壇植花王姚魏良忘機久結盟鷗社得意閑觀狎
鷺塘提壺挈榼堪遊賞家有園池樂壽康

丙寅九月送龍門課試士友

涼風九月菊花天路近龍門自坦然勝友如雲儒雅
集雄文麗藻燦連篇平時學問勤攻玉聖世功名好
着鞭黃屋臨軒新策士姓名一一聽臚傳

和胡適齋韻

得得高軒到澗泉直成空谷喜茫然三詩惠我驚人
句八袞如公現世仙一見長身知潤德頗疑盛際有
遺賢君王已獲非熊兆釣隱如今起渭川

詞

水調歌頭

致仕得請

客問矩山老何事得優游追數平生出處爲客賦歌
頭三十五時僥倖四十三年仕宦七十歸休頂踵皆
君賜天地德難酬詩書數冊棊兩局酒三甌此是日
中受用誰劣又誰優寒則擁爐曝背暖則尋花問柳
乘興狎沙鷗知足又知止客亦許之不

百子令

八旬加二荷君天垂祐扶持老拙日送新來簷外燕
手揀好花輕折比似去年十分強健日看朱詩說篇
三百五歲前儘有披閱天教兩子供官一男留養右

後文惠公有和
卷之四
左相娛悅五見孫枝三拜授童冠參差袍笏四侍鰲
峰擎舟在卽次五今圓月曾孫淳老想能隨叔嬉劣
哨遍
江山風月耳目聲色取之無禁用之不竭造物之無
盡藏月白風清有客有酒踞虎登龍放舟中流聽其
所止而休焉歸去來兮昨非今是舊菊都荒新松老
矣吾年今已如此歸去來兮忘我忘世草木欣榮幽
人感此吾生行且休矣

乳燕飛

一爾炎洗似天知山溪佳處玳筵珠履六十年前今
朝慶門左桑弧蓬矢也侶恁鬱葱佳氣綠髮童顏春
未老問壽星模樣君真是新甲子從頭起應門有子
能承志總人間皺眉底事不關君耳看日孫枝毓
秀袞袞教人滿意更又報門闌多喜飽受人生真富
貴便蟠桃三熟堪彈指知幾個千秋歲

鷓鴣天

安分隨緣事事宜平生快活過年時長歌赤壁東坡
賦又味歸來元亮詞開八袞望期願人生如此古猶

徐文惠公存稿卷之四
稀香飄金粟如來供歲歲今朝薦酒卮

宋學士徐文惠公存稿卷之四終

宋學士徐文惠公存稿卷之五

裔孫 鑒 校梓

誌銘

三友軒銘

大倫有五友居其中于以輔仁匪直朋從直諒多聞
乃益厥躬便柔則損友道斯窮或取諸物曰梅竹松
亦以歲寒匪蒲柳同吾家彌甥蔽軒於東扁以三友
八窓玲瓏人乎物乎惟益之崇頌已者遠無俾憧憧
取友如此有告必忠我作銘詩式輔爾衷

九思堂銘

學造三思再斯可矣今日九思豈思殊旨蓋此有九者之目乃主一無適之謂彼則一而三之不幾乎懂懂朋從之累視必思明非禮勿視聽必思聰非禮勿聽色兮必溫毋狠而厲貌兮必恭毋傲而肆必忠於言必敬于事疑而弗問蒙蔽孰啓忿而不懲或至暴戾見得而思義乎不義物各有則合循其理是謂孔門思誠之學所以著于善言之記若稽洪疇心思曰睿作聖之功日積月累內外夾持存養之粹天君泰然各止其止不思而得自九思始我作銘詩告江夏氏楣門之扁已歷三世乃祖之訓良齋之字陟降是堂合顧是謏敬之敬之一言以蔽

介軒銘

仲友銘其燕坐之室曰介從兄仲立衍其義而爲之銘物之兩間其際曰介辨則必明昧則有晦一念之前有公有私一事之舉有是有非其間幾何不能以寸學以精之毋淆其分鷄鳴而起同是孳孳此舜彼跖所差毫釐豫之六二見微于石三公莫易下惠趙

知壁之此室介於東西一左一右跬步背馳分尺既殊當謹所發我嚴其誼托名于闥

君子亭銘

并序

翔甫姪構亭小園結架皆竹剪茅覆之既成問名于余余曰惟古以竹比君子而近世鶴山先生亦以茅爲君子之屬請以君子名之何如翔甫曰善既書其扁又爲之銘 竝舍西北有亭卓然進脩之暇游焉息焉相彼攸宇編茅架竹易泰其茹詩斐其策允矣君子君子居之匪尚厥德斯焉取斯

斑竹杖銘

斑竹之紋孤竹之傑滋以雨露傲以霜雪修然相間吟風弄月取而爲杖本末有截十節以前更高一節

徐夫人揭氏墓誌銘

族叔母揭氏夫人世居豐城揭源余嘗聞鄉長者言元祐中夫人之族有字伯徹者博學強記游京師不偶東走錢塘以詩百韻干太守蘇文忠公公頗竒之從容問所祖伯徹以漢安道侯揭陽定以對故今之辨族姓者祖焉曾祖諱宰祖諱先民父諱丕承鄉里

世稱善人夫人天性慈靜從幼不妄言笑父母重釋
所適時族父榮叔力學有聲乃以歸焉既歸室爲冢
婦養舅姑相夫子無遺德其處女叔諸婦間始終無
間言治化絲枲必力必時凡家內之事若米鹽細故
以身任之不以累其夫若子平居服御簡約澹如也
歲在乙亥榮叔以疾卒數月夫人立子婦而詔之曰
吾前此未嘗以家事混爾慮妨爾學今不幸爾父棄
我而先且汝長矣我老凡門戶事汝兄弟宜自力若
闕以內婦職也蓋至是始釋煩謝事而子婦亦能娛

侍養志有以佚夫人于老如是十餘年以寶慶丁亥
五月丁未卒年六十六子男二煇慶科女一適同里
甘元秀慶科元秀皆待補大學生孫男四人夫人以
是年十二月庚申塋於所居之後梅樹坡前事二兄
縗服謂經孫曰吾母塋有日幽堂之石已具矣而缺
其銘敢請禮辭弗獲則拜曰諾恭惟先君與榮叔生
同年幼同學長同志墳簞相好若同氣然遇時休暇
蓋無日不相聚也聚則論文賦詩酒無箕爵襍以雅
歌善謔而歸於正經孫嘗侍先君訪榮叔於時賓友

解至笑語竟日觴豆楚楚不戒而具先君因誦東萊
呂成公之言曰求師求友嬾人何與而好善之志不
可不聞知子之來之雜珮以贈之知子之好之雜珮
以報之婦人如是而後其夫能好善矣榮叔亦知疇
昔之所以遂此樂乎榮叔曰然經孫追紀遺言感念
昔者則知夫人之行亦可書也已榮叔諱樞年姓徐
氏家居富城之覺溪上喜能好脩郡嘗三遣試大學
晚號拙庵云銘曰

嗚呼夫人

係漢揭陽

來嬾于徐

闡範用光

夫先其歸

巍彼螺岡

梅坡相望

而不同藏

徐公六十宣義仲盈墓銘

君諱元方姓徐氏仲盈其字也世居豐城之覺溪曾
祖諱尚賓祖諱廷實父諱瑜力學有聲淳熙丁酉初
立待補大學試法首與其選晚號爽軒居士仲盈其
仲子也少頗不羈已而悔曰吾幼不嗜學今時過嗟
何及獨不可撫壯棄穢勉吾力以大吾祖父之業乎
悉索奩中裝曰是足以救吾貧於是徙有之無疾爲
而用舒不數年息千金則又曰吾聞擇人而任時陶

朱之緒餘也乃矚族姻之可任與僕隸之有材幹者
悉畀以貲或坐而賈或行而商多寡各稱其力歲時
子錢輻輳克棟滿羸或有空所携而不敢歸者曰是
何足問仍以畀之卒以不負晚治室屋延師儒誨子
以學曰凡吾所爲不得已而舉也汝祖有遺書故冊
在汝其勉之梅峰吾鄉之佳山也仲盈厥樓面之予
嘗爲名曰層碧大山蕭公書其扁曰良天佳夕聚族
其上酒餘滑稽談笑造次能得人歡心人亦每爲之
醉寶祐乙卯理宗九月七日以疾卒享年七十有三

娶揭氏先君五年卒子男三人克巳克昌克順克巳
亦先君十五年卒女一適同里甘蜚英孫男四宗宏
宗大宗允酉孫女孫一適甘應登蜚英之子也曾孫
男一曾孫女二諸孤將以丁巳十月乙酉塋于所居
之前坊鄧家園前事以書來乞銘余猶記甲寅春鄉
里艱糶人持錢竟日無所遇仲盈首發廩爲倡計口
而糶之人以無餒又記巳卯秋不雨仲盈精禱卒獲
嘉應歲以有秋此二事皆有志於善而鄉人德之者
是可書也巳予視仲盈爲族子年長于予居相比且

相好也銘何可辭銘曰

勤儉以裕其家

詩書以訓其子

是惟仲盈之墓

衍慶源其無已

十四府君山居徐公墓銘

淳祐丙午夏余令臨武收仲弟家問諗余以族姪士貴物故余盡然流涕旣以書致奠且吊其孤越二年余貳郡長沙其孤繼鉉又介仲弟來請銘其父之墓余念昔叔父通直公嘗銘士貴之父矣今何敢以王事不閒爲辭乃叙而銘諸士貴諱希周姓徐氏士貴

其字也初名景周因讀西山真先生希元字說謂景非經旨易名希周曾祖諱浩祖諱檜考諱灼妣甘氏生而終鮮父母鍾愛欲其一意於學不使聞外事自成童志學則延師家塾明窓短檠晨夜程書足跡不妄踰閩旣知方則詣名師重費不憚故東江帥幹林公彥揆以學問文章矩矱後進袂袂雲集士貴每爲林公許可嘉定壬午秋試以詞賦屈充太常博士弟子員君笑曰志于目而中于眉我則無勇然賢關亦吾願遊鼓篋未行而丁父憂惓然終喪隻力膺門無

復四方之志所居富水之北涯環山面勢茂林脩竹
翛然處士之廬扁曰山居今廬陵太守宗丞李公義
山爲書其扁士貴爲人重義輕利自巳事常若戚嗟
畏縮不敢有所爲他人有急慷慨喜自任奮不顧危
難人以是多之丙午正旦忽得異夢語家人曰吾其
不逮七七之數乎果以是歲四月戊子以疾終于寢
生于慶元己未享年四十有八娶同里甘氏子男二
人長曰仙感早夭次曰繼鉉習進士業女三人長適
臨川進士王應津次適甘士元次許適黃季璘皆同
邑進士繼鉉將以戊申十月甲申奉柩塋于富城喜
源之阡距家纔數百武于是係之銘曰
富水之北 喜源之陽 有山如畫 杉松鬱蒼
是爲士貴之藏後嗣其吉昌

內省居士墓誌銘

族伯父內省居士徐公諱桂字億年居豫章豐城之
覺溪其先則撫之宜黃人也曾祖諱端仁祖諱邦義
父諱浩皆蓄德不耀公天性孝友事親左右無違委
順伯氏人無間言考君旣老而傳分橐歲入饑饉而

公能苦攻食淡織嗇自力仰有取俯有拾晚歲家益
豐咸謂公可少紆矣而敝冠短褐自奉泊如未始易
其度獨于勝緣善事則樂爲之脩孔道成徒杠捐金
佛老之宮範鍾塑像金碧丹漆雖重費不憚尤喜蓄
竒方良藥遇疾痛艱棘者和方匕飲之隨失其疾來
謝則却勿受曰人患之謂何又因以爲利豈吾心也
嘗汎掃一室藏馬息馬扁曰內省族姻過從則觴于
是余叔父金陵法曹爲之記故識與不識皆號曰內
省居士平居訓飭子孫惟儉惟勤乃克負荷有布衣

一實得之王父褚藏五十餘年風炙惟時以久不敝
一日語孫執善曰我于吾祖爲仲孫實受此賜今汝
吾仲孫也我死則汝保之公之心蓋可見矣春秋八
十四以疾終于寢實紹定庚寅三月九日也娶同里
甘氏媿德勤家先公二十年卒葬富城鄉之登科里
子男四人燧煇勤生志學女三人適黃佑揭惟脩甘
贊孫男四人應善兩克大學生執善友善明善女一
人適甘壽南曾孫男三人宜孫龍孫符女一人尚幼
其孤將以是年十二月庚申塋於甘氏之兆前事命

經孫曰吾父塋有日敢請銘經孫三辭不獲命則退
而以所聞見誌之恭惟公之壽八十三戶曹甘君同
叔誌其墓所謂醉鄉有備五福之君子也考君壽九
十四特書直道而行略無拘束之語以沒先君嘗跋
其後亦以爲庶幾仁者之壽余嘗謂富貴或可以智
力取壽祉不可以幸而得然可以智力取者或能有
諸其身而不能保諸其子或能保諸其子而不能必
諸其孫甚者一日之間始裕終嗇孰謂耆年備福不
可幸得而祖父子孫之可相望乎今公三世踰八望

九至垂百齡又皆康強考終子孫逢吉豈非積善成
德世濟其美而天道既定常與善人故耶乃係之銘
曰

有祉有年 如祖如父 匪天之私 惟德之裕
我最其德 代石以詩 式告後人 勿替引之

徐孺人黃氏墓誌銘

孺人黃氏世爲豫章豐城人曾祖諱巷祖諱仙父諱
昌隱德勿耀孺人在父母家孝謹專靜從祖柳州錄
事參軍文林公竒之曰是女必貴且壽勿以與凡子

年十七歸我族父徐居士上侍重堂禮無違者時居士家尚微孺人相以儉勤姑叔多幼孺人視猶弟妹迨畢婚嫁貲助爲多閭閻五房性靜躁不一食指且千孺人盡已而恕人門內肅雍帥之爲順至相語曰我學長姒諸子少長居士遣從師資或延至家塾孺人仰承盡禮居士旣捐館孺人誨子若孫尤篤介然自守持門戶益嚴經理有方家益裕然自奉簡約則履其素歲在辛未天子慶東朝壽馳恩區內凡父母年高者賜有差孺人年應詔書縣府以聞始受封子

燮新堂落成迎養有偉經孫爲取命書其錫華偕以開壽域之辭扁曰華壽湖南常平使者姚公大書之拜命之日子婦孫曾羅拜上千歲壽孺人飲而醮且曰吾逮事曾舅姑今抱曾孫頽仰六世老身康健且拜天子錫命何以報造物惟一念平善尚庶幾焉汝曹共勉之淳祐癸卯三月甲申以疾卒孺人莊重寡言笑至有所教戒言從理到聞者心服待族姻以厚凡貧無歸或不能自衣食者隨力贖之歲凶少食不自足而飽饑者御臧獲以恩不責所短晚歲尤樂善

事老佛之宮有謁必施日課西方書若有所自得者
居士諱椿年季父通直公賞銘其墓曰資之奇學之
時材與命違人人以爲至論子男四人曰煇曰炎皆
先卒曰燮曰熹好學能家孫男九人方競于學女二
人適同里進士孫禮仲范舍曾孫男二人女孫三人
長適同里黃瑀餘尚幼其孤將以卒之明年十月癸
酉奉孺人柩塋於所居富城鄉羅坑之源羊角峰之
下前事燮熹縗服過經孫哭且拜曰先親塋有日敢
乞銘經孫自念幼辱知憐長蒙授館且母與孺人生

相好誼不敢辭謹序而銘之銘曰

婉婉令儀

允婦允母

始于儉勤

終貴且壽

鸞誥煌煌

天子之錫

人曰以年

天其以德

羊角之峰

鬱天其蒼

山環水環

子孫其昌

仲表上舍墓誌銘

君諱緯孫仲表其字也姓徐氏世居隆興豐城之覺
溪曾父諱長孺號桂巖逸人大父諱濬累贈承仕郎
直院侍郎李公劉銘其墓曰覺溪先生考諱茂異累
贈奉直大夫皇妣吳氏累贈令人仲表生嶷然甫就

外傳與群兒殊年十二隨先大夫客授能以身律同
學者未冠習舉子業下筆數百言既冠與予偕假館
以養名節歸省各以所得相琢磨歲在乙卯元叔通
直公克賓貢仲表待補大學明年通直公擢第春官
仲表試成均不利歸而益治其學自是學益工從遊
者亦衆凡經口講指授者隨資稟有就升於學薦於
鄉登於仕版者皆有之寶祐癸丑予綴朝班仲表補
國學生私試賦用盈缶納約自牖原韻云處富貴之
地者入儉最難因開明之天者進言孔易司成孫公

願質喜其氣老語勁既謁謝孫公曰吾得人矣尋謁
告歸今年天子加恩三學皆得試別顧仲表初不欲
就予強之試不偶別予曰功名有分弟歸不復來有
子可教抵家書遺予曰屋西架小閣日宴坐其上友
蒼山延白雲課子讀書有足樂者余心嘉之悵然作
風雨對床之想書還未達而仲表以疾終矣嗚呼痛
哉仲表學識有源委作文有氣骨臨事辨義利與人
交有信生平不妄登人門惟知于清敏范公應鈴
最深清敏登朝持節江西湖南皆與俱景定庚申胡

徐文惠公集卷之五
馬透渡哨至隆興大岸已而臨瑞故鄉人大恐皆欲
逃生山谷間仲表曰吾徒不幸而遇狄難仕者死官
守居者死墳墓義也且望風先動虜未必至而鄉皆
寇矣卒不動衆恃以安其臨難有見如此故其歿之
日識與不識無不傷悼初娶同邑胡氏再娶崇仁胡
氏三娶同邑歐陽氏子男三人思謙早夭思誨思謨
女二人長適同里范藻今任南安軍南康縣令登之
子也次尚幼仲表生慶元丁巳閏六月丙子卒於景
定壬戌八月乙酉得年六十六以是年十月丙辰葬

余坡去家纔百弓地從治命也嗚呼自先大夫捐館
弟兄相依爲命扶持門戶不幸仲敬早世今仲表又
棄我逝矣惟予與季第相望於千里之間諸孤斬然
幼者未齒益重鵠原之痛嘗三疏乞歸願未之遂思
謨以遠日來告謹識其悲而銘之曰

有學以爲本 有文以爲華 涉壁流而弗濟

吁其命耶

仲正學舍墓誌

君諱綱孫字仲正姓徐氏上世撫之宜黃徙隆興豐

城之覺溪蓋三百餘年矣詩書之澤日演以盛曾祖
諱長孺號桂巖逸人祖諱濬特贈承仕郎父茂異累
贈大夫妣吳氏累贈令人仲正天性孝友九歲喪大
夫公執禮如成人從諸兄讀書學文知自刻苦辛卯
秋試克待補太學生是冬從予侍宜人之官長沙益
勵於學越二年白宜人曰伯氏有祿養親仲叔又皆
官授先廬誰與守綱孫請歸宜人許之既歸且學且
耕力貧自拔積勤儉三十年田有租山有本撤故廬
而新之堂有序一閣翬飛族姻朋友往來臨風對月

盃酒相屬歡如也余兩登朝有西湖之約不及踐癸
亥冬予以煩言去國仲正迂至臨川以予得歸喜見
顏色蓋自是無日不相聚也今年三月以疾歸自邑
余日夕往問必冠而後見越五月卒嗚呼余弟而止
是耶娶何氏子男一人思誨女一人皆幼仲正處已
謙與人周故卒之日哭者必哀蠶生於丁卯四月癸
巳卒於乙丑三月辛巳得年五十有九以是年十二
月壬申葬于所居富城鄉含山之源予惟兄弟四人
同受先世簡書之托今諸弟既沒予獨後死昔嘗誌

二弟今又忝誌季弟耶泚筆淚落不知所云是年實
咸淳元年

貢士徐君北壑墓銘

君諱泳孫字仲時元名子中姓徐氏世居隆興豐城
之覺溪曾祖諱長孺號桂岩逸人祖諱濬承仕郎學
者以覺溪先生稱之父諱譚登嘉定庚申進士第歷
吉州安福縣主簿建康司法柳州司理以通直郎致
其仕仲時生而警敏年十二三通直公携之客授於
外嘗語之曰我以貧故受人子弟之托力暇及汝汝

宜自力每授業卯時拱侍左右他生有未習仲時轉
以曉之暨隨宦四方多識名人先達所得前言徃行
尤多如金陵陪都之形勝湘南海外之風物時時爲
人誦之聽者如親見而身歷之也通直公卒仲時扶
護以歸旣終喪又改葬母饒氏夫人禮無違錯爲文
有氣骨以理致爲主試庠序輒出流輦右歲在戊午
借計上春官今上登極又以潛藩恩試禮部俱不偶
益自奮勵孰謂天不假年竟齎志以歿耶仲時生於
嘉定戊辰五月甲子卒于咸淳庚午四月三日享年

六十有三娶臨川方氏居士諱叔淵之女子男三人
思諒思諒皆向學思諒尚幼女三人長適承信郎趙
大球先仲時弟三年卒次未許嫁而夭次適同邑進
士范坤載仲時事親孝處族姻以和待朋友以信尤
篤于教子知己過從觴味連日人或以急難告不以
存亡有無爲辭故卒之日弔者甚哀聞者悼痛思諒
將以是年閏十月己酉奉母命葬于所居水北山之
陽去家纔數武嗚呼覺溪先生五孫先通議四子通
直一子余最長仲時最幼仲表仲敬先後淪謝余癸
亥來歸惟仲正仲時相聚仲正不幸以乙丑歲沒好
天良夕杯酒從容惟余與仲時爾今又棄我而逝余
讀昌黎集見其銘崔叔清曰朝之言嘻嘻夕之言怡
怡不見而死吁其可悲嗚呼昌黎於同官尚爾况余
兄弟之至情乎銘曰

氣吞餘子兮智可一官清秋一鶚兮飛不盡翰天
旣生之兮曷成之艱年未中壽兮返其家山義木
之亭兮瀛洲之灣精爽如在今往來其間山明水
秀兮面勢平寬後人之利兮宅兆之安我銘諸幽

徐文惠公存稿卷之五
今百世不刊

宋學士徐文惠公存稿卷之五終

宋學士徐文惠公存稿附錄

裔孫 鑒 校梓

詔誥

留引年詔

勅尚書省所奏乞引年致仕具悉唐孔戣爲尚書年七十三上書去官韓愈止之曰公尚壯奚去之果至奏疏流行到今以爲美談卿年尚少于戣是一不宜去漢儒貢生以子少欲退初元有詔止之曰以王命護生家雖百子何以加卿自言有子肯堂又過貢氏

多矣是二不宜去矣以直清典朕禮以華皓從吾見
方于卿有賴所請宜不允

留致仕詔

國家體臣務合九經尊賢之典大夫有德奚拘七十
致仕之文以卿厚重有常碩大且儼由翰林而進今
之職既特拜于延康任耆社而當壽之年宜養恬于
崇福雖齒之宿而力未愆若爲抗章遽欲投綬故國
有喬木每懷舊德之高華髮爲元龜尚冀遠猷之告
引年之請非朕樂聞所請不允

皇太子送出朝劄

輔青宮之教久藉儲端綴文右之班莫挽內相有懷
警誨無計挽留顧行色之匆匆重此情之戀戀將寸
忱于實篚少效勤倦渺千里之歸舟特加珍護敬有
塵溷伏冀炳融

贈金紫誥

佚老丘園久遂掛冠之志輸忠獻畝忍聞易簣之言
嘗首橐班可稽禋典資政殿學士正奉大夫豐城開
國伯食邑九百戶致仕徐經孫端方有守孤潔無朋

徐文惠公存稿 卷之四 金
三百四
出領屏藩備殫牧禦入司獻納畢吐忠嘉乃辭金馬
于直廬自適白駒于空谷朕載嘉雅尚遐想高風前
代金章之官所以華耆德我朝資政之職亦以寵舊
臣惜不畀于生前徒加榮于身後庸頒特命姑寄深
悲噫一鑑云亡孰効進規之益九京可作尚欽追錫
之榮可特贈資政殿大學士金紫光祿大夫餘如故
宋翰林學士贈金紫光祿大夫謚文惠徐公墓
表
嗚呼官至於金紫壽至於大耄其生榮矣雖晚福考

終不及悲于風景而幽堂改奠廼屢越於星霜君子
羨學士徐公之令終亦重悲其閔世之不克以禮葬
也坏土荒涼與凡民等墓前不容一圓石書其姓名
謹按豫章徐氏皆出高士而覺溪之徐名在進士科
舊矣公諱經孫字仲立初名子柔應舉始改今名登
寶慶丙戌王會龍榜進士出身歷官潭州瀏陽主簿
郴州永興令知桂陽軍臨武縣事通判潭州國子博
士監察御史福建提刑安撫知福州貳秘書宗正起
居左右史兼給事中刑部侍郎禮部尚書翰林學士

知制誥度宗在東宮公初爲資善堂直講又歷諭德
庶子詹事爵至豐城伯官至正奉大夫遺表贈金紫
光祿大夫以紹熙壬子九月辛亥生成淳癸酉閏六
月乙亥薨逝曾大父長孺太父濬以公贈承仕郎妣
范氏繼唐氏俱贈孺人考茂異以公贈至通奉大夫
妣吳氏贈淑人娶饒氏贈淑人子男三人思詵知饒
州鄱陽縣事思訓知贛州府贛縣事思誼前杭州檢
點所提幹桑海一變蘭玉連摧孫男四僅存者三敏
學承務郎務學通事郎心學公薨後乃生曾孫男四

璫亦早逝璋瑜生晚皆不及見里居洪撫之境有山
方正因號矩山公之在臺察給舍彈劾繳駁屢犯戚
里近侍景定間賈似道初相莫敢議執政善否公抗
論買公田不便未幾除翰林學士知制誥是官舊不
常設旋以御史舒有開奏免所居官遂歸不復仕度
宗以宮僚欲留莫得尋奏畀祠祿逮其卽位以引年
致仕屢除不拜榮以書殿加以封邑及聞遺表備極
恩贈閑居十年皆似道秉政之日辭世三年始有魯
港之敗舉目山河之異公不及見矣惟公貴而能貧

不治產業身後蕭然思訖等嘗奉柩塋于所居之水
北俄以地理家異辭舉遷世換人亡孤弱不克塋歷
四十有三年爲延祐丙辰三月二十六日諸孫始復
奉柩祔于始祖何夫人墓左其塋也多心學之力敏
學走郡請于朋來願書墓石惟公卽世已久當時及
門之客莫有存者余弱冠以里中子嘗托門塾故不
敢辭而表其墓曰

斯墓也是昔翰林學士也是在烏臺而不畏權貴者
是在鸞臺而不畏近侍者是景定罷朝而不附公田
之議者是咸淳遜野致爲臣而不仕者避世十年辭
世三年而山河異矣葬之緩急正不暇爲身計也吾
書在石勿礪勿燧倘見采于太史也

里生前進士熊朋來撰

史志

宋史本傳

徐經孫字仲立初名子柔寶慶二年進士授瀏陽主
簿潭守俾部牙契錢至州有告者曰朝廷方下令須
行十七界會令若此錢皆用會小須則幸而獲大利

矣經孫曰此錢取諸保司出諸公庫吾納會而私取其錢外欺其民內欺其心奚可哉詰旦悉以所部錢上之其人驚服有愧色辟未興令知臨武縣通判潭州帥陳韓雅相知事必咨而後行秩滿田豐儲倉提官進權轄國子博士兼資善堂直講爲監察御史劾京尹厲文翁言僞而辨疏入留中宣諭至再卽日出關上遣使追之不及進直寶章閣福建提點刑獄號稱平允歲餘陞安撫使召爲秘書監兼太子諭德經孫爲安撫時韓家居門人故吏有撓法者不得逞相

與撻撼至是韓起家判本郡懷私逞忿無復交承之禮卽日劾奏通判語侵經孫謂席卷府庫而去於是罷通判削其秩經孫造朝具白于政府事上聞帝大怒諭宰執曰陳韓老繆至此宜亟罷之於是經孫再詣政府言其韓門生也前日之白公事也苟韓以是得罪人謂我何請之不置俾自乞閒明通判無罪識者韙之遷宗正少卿起居舍人起居卽入奏君人者當守理欲之界限遷刑部侍郎兼給事中陞太子左庶子太子詹事輔導東宮者三年敷陳經義隨事啓

廸太子入侍必以其所講聞悉奏之帝未嘗不稱善
景定三年春雷詔求直言經孫對曰三數年來言論
者以靖共爲主有懷者以譁訐爲戒忠讜之氣鬱不
得行上帝降監假雷以鳴切中時病公田法行經孫
條其利害忤丞相賈似道拜翰林學士知制誥未踰
月諷御史舒有開奏免罷歸授湖南安撫使知潭州
不拜授端明殿大學士閒居十年卒贈金紫光祿大
夫經孫所薦陳茂濂爲公田官分司嘉興聞經孫去
國曰我不可以負徐公遂以親老謝歸終身不起

江西通志列傳

徐經孫字仲立擢寶慶二年進士授瀏陽主簿辟未
與令進直寶章閣福建提點刑獄遷安撫使尋召爲
秘書監兼太子諭德宗正少卿起居卽入奏君人者
當守理欲之界限陞太子左庶子太子詹事輔導東
宮三年太子入侍悉以其所講聞奏帝未嘗不稱善
會春雷詔求直言入對日數年忠讜之氣鬱不得行
上帝降監假雷以鳴言皆剴切深中時弊後加端明
殿大學士閒居十年卒

江西參政林庭楫
副使周廣纂脩

豐城縣志列傳

徐經孫字仲立覺溪里人濬之子號矩山登寶慶進士授瀏陽主簿潭守俾部牙契錢至州有告者曰朝廷方下令頒行十七界會令若此錢皆用會小須則幸而獲大利矣經孫曰此錢取諸保司出諸公庫吾納會而私取其錢外欺其民內欺其心奚可哉詰旦悉以所部錢上之爲御史劾京尹厲文翁言僞而辨疏留中宣諭至再卽日出關上遣使追之不及召爲秘書監太子諭德遷給舍論謝堂不宜以後族次對

西清繳董宋臣不宜以近倖與兵柄陞太子詹事敷陳經義隨事啓迪景定二年春雷詔求直言經孫對曰三數年來論者以靖共爲主有懷者以譁訐爲戒忠謹之氣鬱不得行上帝降監假雷以鳴切中時病時賈似道議買公田以省糶運經孫亟論非便忤似道除翰林學士知制誥未踰月諷御史舒有開奏免授端明殿大學士閒居十年卒贈金紫光祿大夫爵豐城伯謚文惠經孫旣貴不治產業身歿蕭然塋不利舉遷至再歷四十二年爲延祐丙辰乃克塋

閩大記名宦傳

徐經孫豐城人寶慶間官福建提點刑獄號稱明允
歲餘轉安撫使知福州經孫先宰臨武為潭州帥閩
人陳韓所知既任閩適韓家居經孫秉公守正韓親
屬有撓法者不得逞相與搖撼經孫韓深怒之韓尋
起家帥本郡懷私忿劾奏通判語侵經孫朝命斥通
判經孫造朝具白政府明通判無罪事聞帝欲罷韓
經孫於是再詣政府言某韓門生也前日之白公事
也苟韓以是得罪人謂我何力請不置遂自乞閑識

者韙之

候官野史王應山纂輯
王毓德編次

給事徐侍郎先集序

宋劉克莊

莆田縣人
禮部尚書

某庚申仲冬朔侍立直前奏事越三日蒙恩擢貳夏
卿仍兼西掖時矩山徐公兼東省同論思同封駁每
見公於朝廷文字溫潤精切常自媿其言之繁蕪其
於宮府命令士大夫除授必是是非非義形於色某
素懦雖欲自毀袖中之稿附名淳夫之末而不敢近
傍也兩省同寅者幾二載一日公出二徐先生遺文
一帙曰覺溪公王父也曰觀過堂公嚴考也覺溪之

徐文惠公存稿 附錄
作如蟠桃實如優鉢曇花希世一見見則爲瑞觀過
公大篇如廣樂萬舞短章如廟瑟三嘆鶴鳴章指金
華殿中語也豈特足以補呂氏讀詩記哉二老有文
如此而終身隱約不遇詩書之澤鍾於矩山公之身
宜哉昔坡穎爲文章大宗師而歐公尤稱老蘇秀才
之言曾南豐亦作明允哀詞山谷爲詩初祖而句律
自山鬼水恠着薜荔天祿辟邪眠莓苔之語而出某
於矩山公三世亦云

宋學士徐文惠公存稿附錄

贈詩

監丞樓穎

祗道襟懷止水平那知袖裏有雷霆
姦儔破膽潛幽穴善類揚眉集廣廷
勇退何須三出畫不留可驗少
微星幾年劔氣冲牛斗端的先生炳地靈

見說君王重講書傳宣三日到桐廬
諸賢近歲多遷就公義今朝却展舒
霄漢星辰今失伴溪山風月好
留渠子房高卧周昌蕙商皓應難學二疏

李林後

局勢孤舟駕怒濤急流誰肯暫停篙那知鶻擊秋霜
勁不放鷄音晝夜號鐵面板山輕若厲丹心戀闕銳
如毛見機而作真君子官爵雖卑氣節高

太學徐紘

世事糊塗寧退藏鬼車眼底幾金章空舟清載桐江
月直節高凌栢府霜不爲諸郎官職計只留千載姓
名香煩誰說與歐余蔡要共椒蘭一樣芳

東甌林堯之

夜忤中能叱鶴群竹輿拂曉出脩門去程五里復五
里世道一番差一番國去老醫人共駭史留野筆古
難言此歸向後多風雪不是春晴莫出村

蜀劉仲房

白簡朝陳暮掉頭飄然一葉理歸舟嚴霜載路風逾
勁杲日當空霧欲收嗅藥梅邊還我去尋芳花底爲
渠留劍江千古英靈物紫霧仍前射斗牛

邵陽李茂良

六宮脂粉角春嬌巧畫蛾眉俟燕朝一見傾城傾國

色低頭不敢說妖嬈

侄國博思立山房

寶祐癸丑秋叔父峩豸冠赭袍重親擢率傳爭相煩
諫舌劘帝闕英風凜朝端疾惡懷剛腸憂愛由忠肝
伊者本能哲集處猶交驩醜正恣腹悱罔上多面謾
豺狼正當道獬豸宜觸奸世俗固喜圓忍使方爲利
誰爲中流柱以身障狂瀾誰爲獨擊鵲霜簡先抨彈
手排一不肖汗流三諫官驅厲亦何勇拔山古爲難
夜漏尤抗筆遲明理征鞍行行復行行竟至羊裘灘

公非悻悻者純然炯衷丹聲諫旣莫容身諫那敢安
天王果聖神感悟中赤殫御筆謹勉諭宣使來江干
六千難力挽百壬空膽寒脩明日月皎歸袖天地寬
公出亦榮矣夾道紛圍觀賢哉是丈夫直節看不刊
其間知己者歎噓爲長歎開元與天寶進退惟一韓
汲直不補外漢鼎方石磐願公聞此語憂國強加餐
暫撫松和竹三徑猶未殘黃花香晚節功名攸久看
特奏狀元樂雷發

浙江潮浙江潮聽我撫劒歌長謠何物厲鬼逞妖媚

歟鱗掀舞狐狸嗥奄奄泉下蝮志輩波流風劇何滔
滔亦有忿世嫉邪者往往欲進欲退項背生寒毛天
生聖明眉八彩渾沌槁杌與饕饕惡貫自待滿踈網
終難逃彼哉木魅肆巧辨蠖螾衆正欺蒼高西顛橫
殺氣南岳才涼飈差峩神豸出靈嶠突兀蒼隼凌崇
霄臣有剗蝮鐵臣官栢府曹臣請誅正卯之僞辨臣
請斥國中之昏妖排奸擊佞臣職所當盡釣名賣直
臣心無所要夜飛白簡徹御榻曉披青篔簹歸舟鳧
鴨折翅竟驚逝鸞鳳遐騫邈難招備哉骨鯁臣壯哉

清明朝是爲南州徐高士衡廬翼軫盤結成此豪外
有光霽洒落之氣象中有巉岩斬絕之風標正如豐
城寶劍勁氣射斗牛又如旌陽鐵柱神力鎮逆蛟想
當草奏時百靈護揮毫豐隆執法拱手供服役崖公
富媼降鑿何昭昭功名自將留久遠只今埃壒輕蠅
貂顧予共忠憤曾對選舉條斥狼奸恨不力覲面汗
藍袍陽城陸贄久不作見此偉節頓使鄙吝消古今
富貴磨滅安可數惟有清明萬世常岿然狂歌豈但
張盛美要將硬豎春梁攀華鑣浙江潮浙江潮我詩

激烈應須聽君其問諸釣台之石晉江之濤

萬平埜

西風昨夜忽然狂萬葉飛紅天下霜晚節可觀霜後
菊一番霜過一番香熙豐平地起風波砥柱中流有
老坡舒亶一箋坡老去後學國事竟如何朝雲黯黯
日陰陰泰宇無塵有此心一笑出關天地闊人生至
樂在山林

福州士人

公今持綉斧一似未官時無地通關節憑天判是非
吏閑衙退早事省印開遲八郡闌干月分輝照客衣

宋學士徐文惠公存稿附錄終

題宋學士徐文惠公存稿

宋豐城徐經孫仲立撰凡五卷一奏疏表二講章三雜著四詩詞五誌銘州錄為當時詔誥墓表史志列傳及時人贈詩萬曆刊本題喬孫鑒梓前有萬曆甲寅十一世孫鑒序即其巡按福建時所刻次十二世孫即登序卷首有閩中徐惟起藏書印惟起名燭又字興公萬曆時人則此為梓成初印之本矣又有鄭氏注韓居晉安蔣絢臣陳克綬諸印皆閩中藏書名家也按此集四庫全書著錄所據為衍聖公家藏本題為矩



山存稿提要言前後無序跋祇有劉克莊先集序
一篇今觀此本兩序咸言檢世譜得遠祖集因讐校
卒業付之殺青僅得五卷自非殫力搜索即此寥寥
篇什猶軼逸莫收可知遺稿久止至鹽筴寺始為之輯
錄是公集以此刻為最早館臣所見矩山存稿者必後
人從此刻鈔出而佚其序文附錄以致莫悉其原委耳
經孫詩詞淺無足觀文筆較為疏達要其忠直敢言
聲振朝列故文以人存今就此集觀之其文自奏疏以
外亦殊少雅裁也戊寅七月汪安傳增湘識



